



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIAL

Komunikadu Imprensa

Periodu : Feveiru 2012

Edisaun : 20 Feveiru 2012

Arguidu ba kazu violénsia doméstika hetan pena multa \$ 90.00

Iha loron 09fulan Feveiru 2012, Tribunál Distritál Oe-cusse hala'o audiénsia julgamentu ba kazu violénsia doméstika ne'ebé rejistu ho númeru prosesu 71/PCP/2011 no komete husi kondenadu Jose da Costa Roig hasoru nia kaben Lucia Nheu. Kazu ne'e akontese iha loron 05 Marsu 2011, maiz ou menus iha tuku 12.30 madrugada iha Sikuli, Suku Costa, Sub Distritu Pante Makassar, Distritu Oe-cusse.

Prosesu julgamentu prezide ho Juiz singular Dr. João Riberio, Ministériu Públiku representa husi Dr. Alfonso Lopes, no husi parte defeza, representa husi Dr. Calistro Tout husi Eskritoriu Defensória Públika Regional Oe-cusse.

Diretór ezekutivu JSMP, Luis de Oliveira Sampaio haktuir katak "*JSMP hein katak ho pena ne'ebé mak hamonu ona ba kondenadu, hanesan meius importante ida hodi prevene repetisaun violénsia iha futuru, no nu'udar lisaun ba sosiedade hodi bele intende katak violénsia doméstika nu'udar aktu kriminál ne'ebé mak bele penaliza.*

JSMP nota katak iha alegasaun finál, Ministériu Públiku akuza arguidu ho artigu 2, 3 (a), no artigu 35 Lei Nú. 07/2010 konabá Lei Kontra Violénsia Doméstika junta ho artigu 145 Kódigu Penál konabá ofensas ba integridade fízika simples.

Faktus provadus ne'ebé mak produs durante prosesu julgamentu ne'e, deskobre katak iha loron 05 Marsu 2011 madrugada, maiz ou menus tuku 12.30 kondenadu ne'ebé mak fila mai uma ho kondisaun lanu ba iha nia kuartu. Iha momentu ne'ebá lezada troka hela ropa. Kondenadu ba hakbesik lezada no dada nia kalsa, maibé lezada fo hanoin ba kondenadu katak nia lanu hela, no hases tiha kondenadu nia liman.

Tanbá la kontente ho hahalok lezada nian, kondenadu foti kadeira masa ida no tuda ba lezada, no kona lolos iha lezada nia kelen no rezulta kanek. Aleinde ne'e kondenadu mós tuku tan iha lezada nia kanuruk. Wainhira kondenadu atu kontinua baku lezada, maibé lezada hakilar no wainhira lezada nia aman to'o mai, arguidu halai tiha.

JSMP mós observa katak durante audiénsia julgamentu nia laran, kondenadu hili nia direitu hodi la fo deklarasaun ba tribunál. Maibé ba lezada juiz esplika katak nia iha obrigasaun hodi fo deklarasaun ba iha tribunál, nune'e tribunál bele deskobre faktu sira relasionada ho krime ne'e.

Bázeia rezultadu observasaun JSMP nian, hatudu katak depois julgamentu produsaun provas no alegasaun finál, tribunál imediatamente analiza ba faktus provadus sira ne'ebé produs durante prosesu julgamentu. Husi prosesu ne'e, tribunál hetan konvikasaun (berkeyakinan) katak arguidu provadu komete duni krime violénsia doméstika hasoru lezada ne'ebé nu'udar nia konjúje. Ba kulpa ida ne'e, tribunál hamonu pena multa \$90.00 ba kondenadu no kondenadu mós iha obrigasaun hodi selu kustas judisiáriu \$10.00.

Tuir lei penál, juiz mós fixa kedas pena alternativu kuandu kondenadu la selu multa, mak kondenadu tenke tama iha prizaun durante loron 60.

Atu hetan informasaun klean, favor kontaktu;

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Landline: 3323883/7295795